

Արմատական փոփոխութեան ենթարկեց ուսաների հայկական քաղաքականութիւնը և ներքին կեանքում. հայերն այլևս բարեհաճ ուշադրութեան առարկայ չէին: Վերականգնում էր նախապատերազմեան վերաբերումը: Խստացում էր գրաքննութիւնն ու ոստիկանական հսկողութիւնը քաղաքական կուսակցութիւնների և ազգային-բարեգործական կազմակերպութիւնների գործունէութեան վրա: Մասնաւորապէս, անբաղձալի տարր էին դառնում թիւրքահայ գաղթականները և կամաւորական խմբերից հեռացած զինուորները: Ոստիկանութիւնը նրանց դէմ կիրառում էր խիստ միջոցներ — այլևս պէտք չունէր նրանց:

Եւ, հասկանալի է, հայ ժողովրդին համակում էր դառն հիասթափութիւնն ու վիշտը: Ի՞նչ էր սպասում, ինչ դուրս եկաւ: Թիւրքահայաստանի ինքնավարութեան փոխարէն՝ ահա ուրա բանակի կողմից գրաւած ու ուսասացման ենթակայ ամայի հողեր: Թիւրքահայ գիւղերն ու քաղաքները՝ աւերակ: Ժողովուրդը կա՛մ ոչնչացւած, կա՛մ տարագիր ու բնաջնջման ենթակայ և կամ — աւելի քան 300,000 հոգի — գաղթական վիճակում՝ ապաստանած Անդրկովկաս: «Մեծ դաշնակիցները» Հայաստանը բաժանել էին իրենց միջև, իրբեւ պատերազմական աւար: Հայերին վեհանձնօրէն, շնորհւում էր...

«Եկեղեցական ինքնուրոյնութիւն»: Փա՛ռք «մեծ դաշնակիցներին»...

Միեւնոյն դառն ապրումներն ունէր և գաղութահայութիւնը, որ նոյնպէս խանդավառած էր պատերազմից ստացելիք բարիքներով: Ամերիկայի և Բալկանների հայերը լայն մասնակցութիւն էին բերել կամաւորական շարժման՝ դրամով ու մարզկային ուժերով և սպասում էին, որ, իրբեւ հետեանք հայերի մատուցած ծառայութեանց, Հայաստանին կը տրւի ինքնավարութիւն:

Արտասահմանի հայութեան իղձերի թարգմանն և քաղաքական գործունէութեան կենտրոն շարունակում էր մնալ Պօղոս Նուպարի պատւիրակութիւնը, Փարիզում, որ գործում էր Ազգային Պատւիրակութեան անունով: Նա ներկայացնում էր հայկական դատը պետութիւնների առջեւ և յենւած Ամենայն Հայոց Կաթողիկոսից ստացած լիազօրութեան և համահայկական վստահութեան վրա՝ գործում էր ի նպաստ Հայաստանի ինքնավարութեան: Ինչպէս Ազգ. Բիւրօն Կովկասում, Ազգ. Պատւիրակութիւնն եւս արտասահմանում մեծ պետութիւնների պետական գործիչներից ու կառավարութիւններից ստանում էր խոստումներ ու հաւաստիացումներ, որ հայկական բաղձանքները լիովին կը դոհացեն դաշնակիցների յաղթութիւնից յետոյ:

Այս հաւաստիացումների հիման վրա էր, որ Ազգ. Պատւիրակութիւնը նախաձեռնեց — կովկասեան կամաւորական շարժման հաշւարդարից յետոյ — հայկական լեզէոնի կազմակերպութեան դաշնակիցների արևելեան բանակում: Հայկական լեզէոնը, իր հեղինակների գաղափարով, պէտք է ապագային կազմէր ինքնավար կամ անկախ Հայաստանի բանակի կորիզը: Եւ ինչպէս կամաւորական խմբերը Կովկասում, հայկական լեզէոնն ևս Պաղեստինի ճակատի վրա և ապա Կիլիկիայում երեւան բերեց մարտական ոգու հերոսական արտայայտութիւնների, մասնակցեց մեծ ճակատամարտների, կատարեց պատասխանատու դերեր, շօշափելի կերպով նպաստեց դաշնակից